

山齋集

六冊

鄭山齋先生文集卷之十八

莆田山齋鄭岳

曾孫 炫編梓

墓誌銘

明奉議大夫山東按察司僉事穀齊林公
墓誌銘

莆世族稱姑青林氏宋有回年公者嗜義樂施
甞勑紅泉義學延族子艾軒講授伊洛之學四
方學徒至者咸館穀之平居積陰澤以惠利人

人至于今子孫獨盛其錫類象賢若穀齋者廼
其十二世孫也諱典字汝惇行純五曾大父稔
贈會州衛經歷大父穀累官揚州府同知進階
朝列大夫父憲領鄉薦爲秀水訓導母黃氏生
母姚氏產公于秀庠長娶叅政黃公譽女林與
黃世授業壁經至公尤精舉成化丁酉鄉薦名
第十梓其文甲辰會試乙榜授冠縣教諭丁母
黃氏憂服除改西安教諭其地材素乏公嚴立
條教日與諸生講解風雨寒暑不少輟自是科

目繼起提學吳公伯通稱爲浙師儒第一司寇
彭惠安公每舉爲司教者式兩京廣西連聘校
文所至稱得人擢鄖陽府學教授鄖陽新設郡
治材尤乏公擇其年少質敏者悉令改經親爲
講解如西安時贄儀盡卻或捐俸以資其貧士
習爲變有曾得祿者遂以書經魁湖省連登甲
第而人文漸闢矣主考廣藩謁陳白沙張東所
廷實亦來會談論理奧累日廼別白沙喜謂人
曰自吾與莆人友惟林汝惇天資近道可遠到

也撫治都御史陳公清薦爲宜城知縣宜城縣
小當孔道公儒者素未臨民或難之至則百廢
俱舉若素習於吏然治爲諸邑最撫巡藩臬交
薦擢順天府通判三載書稱最得推 恩贈父

如已官母黃贈安人姚封太安人配黃安人尋
擢都察院經歷各道御史爭圖便差公持資序
不曲副多致憾嫉踰年轉中軍都督府經歷遂
擢廣西按察司僉事甫蒞任聞姚太安人訃服
除改山東奉 勅提督北直隸屯田兼管糧草

嚴限督徵

京畿事涉權貴不少假疏乞休不

許正德庚辰吏部以年及例與致仕又五年爲
嘉靖乙酉壽滿七十六月二十日以疾卒遠近
聞而悲之蓋公敷歷中外幾四十年於先世田
廬未嘗增拓旣致仕家居隘甚屋西稍葺數椽
曰西翠小堂日坐其中稽經訂史罕與人接於
世故紛華泊如也充養內腴貌溫而言確詩文
清雋近時鄉名輩有古意可範俗者如公邈不
可得已悲夫子應文郡庠生側室朱出娶吳孫

永熙永燾永鰲女長適黃刑部文器之子瀛次
適黃僉憲世英之子國子生觀次適方貳守恒
謙之子鄉進士從鯤俱黃安人出又次適方方
伯文玉之子國子生直側室梁出瀛從鯤俱夭
二女守節無玷蓋得之家教云黃安人先卒葬
于楊山至是應文卜以嘉靖丁亥十二月二十
九日未時奉公樞合窆先期具事狀請銘予曰
公與素翁同宗且受知最深是銘宜翁爲之曰
翁病辭以屬公亦先君意也廼序而銘之曰視

官之能徵厥施視官之守徵厥遺始職一校陟
臬司歷官三紀守故留瑩然渾璞絕瑕疵聿求
古人其庶幾我銘其藏無愧辭

明前文林郎潮陽縣知縣友泉宋公墓誌
銘

宋氏自節推諱銑者自晉江徙居莆之後埭族
久以大國朝沐陽訓導公諱勸國子助教贈
禮部主事公諱汝勤仍父子儒職以學行稱主
事生立齋公諱端儀博極羣籍遠尋程朱遺緒

究其指歸作考亭淵源錄其他著述尚多海內
推爲碩儒官終廣東提學僉事廣人祀于仰高
祠是爲公父妣封安人黃氏慈而能訓故公德
器夙成弘治乙卯鄉試名第一卒業太學銓授
廣東潮陽縣知縣潮俗豐侈大姓喜武斷持陰
罪相構陷公至朔望矢于神絕苞苴請托開諭
以至誠解仇脩睦小大咸懷往時民糧差役偏
重公總一邑丁糧通融均派民得以紓允可以
省費裕民者悉心爲之而尤汲汲於正風俗造

就人才會兩科供事場屋多所薦達因而成名者甚衆有鄉宦陳洸者橫甚因請托不行啗公嗾監司羅織以重罪指使劇賊曾鉞頭誣以賊賊終不忍加污民有李戴琥連氏者甘受撻死以直公寃故其事卒得白公久繫無聊嘗作訴寃錄會洸居言路肆排善類搖國是臺臣有得公訴寃錄者封以上聞 詔遣官往訊得其實洸夤緣奏辯逮公下 詔獄廷鞫洸所奏公事無一驗竟奪職爲民初公去潮赴廣民奔走省

下者百千人致薪米以賙其乏公再經潮民湏
洞出迎爭致金幣爲贈却不受廼合所却金建
生祠于北衢聯石爲巨碑以翰林編脩王君思
時謫官鄰封知其詳屬爲之記里巷刻小碑以
十數又於東山穹石大刻清慎仁愛宋公去思
洸惡之毀祠與碑洸死衆復脩祠重刻碑時節
致水土物候問生慶死賻雖古循吏不能過然
公亦坐是忤豪右荐罹大禍瀕九死不悔方被
逮時所親送至郊環泣公慷慨言曰聖明在

上生還有日何遽生哭人爲也一咲而別來逮
者錦衣衛千戶常忠廉公居官貧絲毫無所取
且善視之許其子曰或從當是時權勢赫焰禍
叵測卒賴公議扶持不然身家俱碎矣公旣幸
脫禍時與鄉耆舊林翁孚可輩爲逸老會取樂
山水間其於世故泊如也家雖世宦無厚蓄訓
導助教祠田薄公割私田以助構專祠以祀立
齋且倡脩大宗祠割地租以充祠費脩始祖節
推評事公墓而并及先世諸墓割田租以祭蓋

悉心致孝於其先而施及姻族舊故率厚無薄其所遺於諸子者衣食僅僅而已立齋公在廣得士心其門徒宦吾閩公絕不干以私嘗曰低首下心爲兒孫計吾耻之其宅心靜定言有物而行有恒庶幾前輩之風焉名嵩字元翰以字行更字良翰號友泉配黃氏行人司副乾亨公女端靜善持家側室林氏陳氏凡三男四女長曰敏郡庠生娶林長史希瑩女繼娶林次曰徵娶黃主事文器孫女次曰敦娶林貳守克容

女先卒女長適方鄉貢思久之孫惟忠次適余
子詹事府錄事泓次適方尚書簡肅之孫郡庠
生夢升次適吳憲副約中之孫紹宗孫男四人
大勛大昌大景大旦女六人嘉靖丙申公年七
十一矣秋間忽遘疾八月初三日卒於平傷哉
公嘗於文賦里梅庵山營治二壙至是曰敏結
砌完固卜以今年己亥正月四日奉公窆焉虛
其左爲黃氏壽藏同社友林翁以永述行狀余
姻且友也爲之銘曰惟宋家學世儼河汾衍及

立齋益廓有聞公受型範德器融渾首解省闈
卒業成均柄授則優薄試一邑式徵往轍矢心
舉職爬梳宿垢狂狡帖息撫摩以仁大小悅懌
憮人弗利巧事羅織百折艱屯終覲天日祠毀
載飾碑毀載立惟潮於公永垂血食考德論世
我銘斯石

中憲大夫四川按察司副使吳公墓誌銘
嘉靖十二年臨淵吳公年七十矣公素彊健倏
遘疾彌留亟召諸會友屬處分後事少間作詩

訣別其落句云而今採藥武夷去流水桃花春
鳥聲又詩別其弟取殮衣閱之凡喪葬事皆預
授意以行十一月朔日遂卒嗚呼死生大變也
公處之超脫不亂如是其素所造養足徵矣公
諱希由字約中號臨淵唐莆田知錄公良之後
世居可塘後徙泄口俗仍舊名墓堯實泄口云
公自其少時從鄭司訓體健學于城中愛其名
物爰自蜀歸遂卜居城右然泄口族黨在焉廼
與二弟希瞻希平恢拓舊宅往來居之示無忘

也始由弘治己未進士授南京刑部主事決滯
摘伏有聲丁內艱服除擢署員外郎尋晉郎中
聲績益振出僉浙江按察司事後改提督兩浙
及南直隸蘇松等處水利屯田兼督捕盜賊前
後凡三奉 璽書以行職務繁劇矢殫勞勩濬
淤築隄化荒爲沃民相率立石紀績都憲俞公
特奏旌之復屯田舊額而釐其宿蠹會劉賊渡
江公以兵屬總制陸公卒成擒擢四川按察司
副使備兵威茂其地犬牙番夷時扼險肆掠爲